

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### NEKAZARITZA SAILA

#### **246/2017 Foru Agindua, uztailaren 18koa, Arabako Lurralde Historikoko ehiza jardueraren berriazko xedapenak arautzen dituena 2017-2018 denboraldirako**

Arabako Lurralde Historikoak badu ahalmena, erkidego osoko erakundeek arautu ez dituzten arlo guztietan, ehiza jarduerari buruzko arauak garatzeko, baldin eta erakunde horiek eman dituzten arauetara moldatzen bada. Ahalmen hori erabiliz, ekainaren 14ko 8/2004 Foru Araua, Arabako Lurralde Historikoko ehizarena, onartu zen. Foru arau horren 32. artikulua ezartzen du Ehiza Lurralde Kontseiluari entzun ondoren Arabako Foru Aldundian ehiza arloan eskumenak dituen sailak onartuko duela Arabako Lurralde Historikoan ehizan jarduteko berriazko xedapenak arautuko dituen urteko foru agindua, non honakoak zehaztuko baitira gutxienez: ehizaren eta merkaturatzearen aldetik interesa duten espezieak; araudiak; leku desberdinetan espezie desberdinen ehizarako aplikagarri diren aldiak, baimendutako egunak eta orduak, ehizan egiteko modalitateak eta harrapaketak adierazita.

Halaber, martxoaren 17ko 2/2011 Legeak, Euskal Autonomia Erkidegoko ehizarenak, 31. artikuluan zehazten du zein diren foru aldundiek urtero eman behar dituzten debekualdi aginduetan gutxienez jaso behar diren edukiak.

Kontuan hartu dira ehizaren urteko araupetzean eragiten duten eta honako hauetatik eratortzen diren alderdiak: estatuko araudia — 1/1970 Legearen, ehizarenaren, Erregelamendua; eta 42/2007 Legea, ondare naturalarena eta biodibertsitatearena —, Europako Batasuneko 2009/147/EE eta 92/43/EEE zuzentarauak, eta Bernako 1979ko Hitzarmena.

Araudi hori betez, Arabako Foru Administrazioako Aholku Batzordearen adierazpenak aintzat hartu ondoren, Ehiza Lurralde Kontseiluak 2017ko maiatzaren 19an esandakoa entzunda, eta dagokidan ahalmenez baliatuz, honako hau

#### XEDATZEN DUT

##### **1. artikulua. Baimendutako egunak eta orduak**

1. Arabako Lurralde Historikoko ehiza esparruetan ehizan aritzeko baimendutako egunak honako hauek izango dira: aldi baimenduaren ostegun, larunbat, igande eta jaiegunak. Hala ere, oro har ehiza esparru bakoitzeko baldintza tekniko-zinegetikoen agiriak eta ehizako jarraipen planek, bai eta ehiza aprobetxamenduko berriazko beste arau batzuek ere, jasotzen dutena aintzat hartu beharko da.

2017-2018 ehiza denboraldian ez da aprobetxamendu komuneke ehiza lurrik egongo lurraldean.

Espezie jakin batzuei dagokienez, arloan eskumena daukan sailak ehiza esparru bakoitzerako onartutako ehizako jarraipen planetan zehazten diren egunak hartuko dira kontuan.

2. Oro har, 08:30etik 17:30era jardun ahal izango dira ehiztariak ehizan, salbu eta debekualdi erdian badaude, postu finkoetatik usoak eta birigarroak ehizatzen ari badira eta berriazko baimena badute.

##### **2. artikulua. Baimendutako aldiak eta berriazko arauak**

Salbuespenak aparte, hauek dira 2017-2018 denboraldian ehizan aritzeko baimendutako aldiak:

## A) - Debekualdi erdia:

Abuztuaren 15etik irailaren 10era (biak barne). Baimendutako egunak hauek izango dira: ostegunak, larunbatak, igandeak eta jaiegunak, egunsentitik ilunabarrera arte, hau da, eguna argitzen duenetik ilundu arte.

Hona hemen harrapatu daitezkeen espezieak: galeper arrunta, untxia, belabeltza, haitz usoa, pagausoa eta txoloma, usapala, mika eta azeria. Hiru usapal harrapatzeko kupoa ezartzen da pertsona eta egun bakoitzeko.

Usiak eta birigarroak apeuz edo apeurik gabe postu finkoetatik eta debekualdi erdiko sasoiari ehizatzen badira, modalitate horretarako ezarritako ehizako berariazko arauak aplikatuko dira.

## B) - Ehiza xehea:

Urriaren 12tik 2018ko urtarrilaren 28ra, biak barne.

1. Untxia (*Oryctolagus cuniculus*): debekualdi erdian eta urriaren 12tik 2018ko urtarrilaren 28ra.

2. Erbia (*Lepus sp.*): espezie horren populazioa Arabako Lurralde Historikoan zein egoeratan dagoen ikusita, eta egindako ugaritasun laginketen arabera, beren ehizako jarraipen planetan ehizatu daitekeela ezarrita duten esparruetan baino ezin izango da espezie hori harrapatu, abenduaren 1etik 2018ko urtarrilaren 6ra bitartean.

3. Eper gorria (*Alectoris rufa*): Azaroaren 1etik 2018ko urtarrilaren 6ra, biak barne. Pertsona bakoitzak eguneko hiru eper gorri baino ezin izango ditu harrapatu.

4. Oilagorra (*Scolopax rusticola*): 2017ko urriaren 12tik 2018ko urtarrilaren 28ra, biak barne. Debekatuta dago espezie hori itxaronda harrapatzea baimendutako aldiari. "Eskuan" eta "saltoan" txakurrez lagunduta baino ezin izango da harrapatu. Pertsona bakoitzak eguneko hiru oilagor baino ezin izango ditu harrapatu.

Esparru batzuetan oilagorretarako zona bat baimenduta badago, hura ezin izango da izan esparruaren azalera osoaren ehuneko 25 baino handiagoa, eta egunean ehiztari bat 100 ha bakoitzeko egon ahalko da gehienez ere.

Berritze aldiari dauden esparruetan, oilagorretarako balizko zona hori ehiza antolamendua- ren kasuan kasuko plan teknikoan sartu behar da.

5. Uso migratzaileak eta birigarroak: behar bezala baimendutako uso postuetan urriko lehen igandetik abenduko lehen igandera arte, biak barne, egun baimendu guztietan. Aldi horretatik aurrera, 2018ko urtarrilaren 28ra arte, 1. artikuluan zehaztutako ehiza egun baimenduetan baino ezin izango dira harrapatu postu finkoetatik. Arabako Errioxako esparruetako behar bezala baimendutako birigarrotarako postuetan azaro eta abenduko egun guztietan eta 2018ko urtarrilaren 28ra arte ehizatu ahal izango dira.

Baimendutako postu finkoetatik egunsentitik ilunabarra baino ordu bete lehenagora arte harrapatuko dira.

Postu horien kokapena, batetik besterainoko gutxienezko tartea, debekuak eta edozein ehiza esparrutan haiez baliatzeko eskubidea foru agindu osagarri eta berariazko baten bidez arautuko dira, zeina dagokionean argitaratuko baita.

6. Azeria (*Vulpes vulpes*): debekualdi erdian eta 2017ko urriaren 12tik 2018ko urtarrilaren 28ra.

## C) - Ehiza larria:

1. Basurdea (*Sus scrofa*):

1.1 Aldi baimenduak: 2017ko irailaren 9tik 2018ko otsailaren 25era, biak barne.

2017ko irailaren 9tik urriaren 12ra eta 2018ko urtarrilaren 28tik otsailaren 25era uxaldiaz baliatuta baino ezin izango da harrapatu basurdea.

2018ko urtarrilaren 1etik otsailaren 25era harkaitz inguruetan uxaldiaz baliatuta ehizan aritzean, oro har, maiatzaren 22ko 229/2015 Foru Aginduan xedatutakoaren arabera jokatu beharko da, onartzen duena Euskal Autonomia Erkidegoan Europar Batasunaren Intereseko Hegazti Nekrofagoak Kudeatzeko Baterako Plana, Euskal Autonomia Erkidegoko Administrazio Orokorrak eta Arabako, Bizkaiko eta Gipuzkoako foru aldundiek batera idatzia.

1.2 Baimendutako egunak eta orduak: Basurdeak uxaldian ehizatzeako baimendutako egunak ostegunak, larunbatak, igandeak eta jaiegunak izango dira, 08:30etik 16:30era.

1.3 Baimendutako esparruak: Oro har, Arabako Lurralde Historikoko ehiza larriko esparru guztietan ehizatu daiteke espezie hori. Hala ere, harrapaketa kupoak eman ahal izango zaizkie esparruei, baldin eta espazioaren kudeaketarekin arazoak badaude, behar bezala egiaztatuta.

1.4 Ehiza modalitateak: Basurdeak soilik uxaldian harrapatu ahalko dira, zelatan arkuera erabilita, itxaronda eta saltoan. Saltoan, eskopetarekin baino ez eta balaz, gehienez ere lau txakur-rekin eta hiru ehiztarirekin txaleko deigarriak eta erraz ikustekoak soinean jarrita, harrapatu ahalko dute hala egin nahi duten esparruek, betiere bakoitzak ehizako bere jarraipen planean hala adierazita.

1.5 Taldeko kideak. Ehiza taldeetako ehiztari kopurua hamabi eta berrogeita bost artekoa izango da, eta gutxienez hamar txakur izan beharko dituzte, behar bezala identifikatuta. Nola ehiztariek hala haizatzaileek txaleko deigarriak eta erraz ikusteko modukoak izan beharko dituzte soinean uxaldiak dirauen denbora guztian, eta haizatzailearekin ibiliko den orok berekin izan beharko du dagokion erkidegoko ehiza baimena.

1.6 Uxaldiaren seinaleak, kako kopurua eta armak garraiatzea: Uxaldian, eremura iristeko bide eta sarbideetan informazio kartelak nahitaez jarri beharko dira, II. Eranskinean jasotako ereduaren arabera. Uxatzaileetarako bik eskopeta eraman ahalko dute, basurdea errematatzeako edo txakurrei eraso egitea saihesteko. Ordu-tegiaren arabera aukera badago, uxaldian bi harrapaldi egin ahal izango dira, eta armak zorrotik atera gabe eraman beharko dira ehiza postuetaraino.

1.7 Uxaldien esleipena: Nekazaritza Sailak bai esparruen elkarteei bai elkarteetako kide ez diren esparruei denboraldirako zenbat uxaldi esleitu zaizkien jakinaraziko die, bai eta uxaldiak nola egin xedatzeko arauak ere.

1.8 Uxaldien datak jakinaraztea: Esparru bakoitzak Mendi Zerbitzuari eta Natura Ondarea-  
ren Zerbitzuari, hala badagokio, jakinaraziko die, gutxienez hilabete lehenago, zein egunetan egingo diren uxaldiak, eta zer izen eta NAN zenbaki duten hura koordinatzeaz arduratuko diren pertsonak, titularrek zein ordezkoez.

1.9 Koordinatzaileen funtzioak: Uxaldiaren koordinatzaileek uxaldia bera orokorrean antolatzeako funtzioa bete behar dute. Alegia, ibilgailuen joan-etorria arautu behar du, argibide-  
deetarako seinaleak jarri behar ditu, uxatzaileak banatu eta ehizatzeako non kokatu behar dituen erabaki behar du, bai eta uxaldia noiz hasi eta bukatuko den zehaztu ere. Halaber, uxaldietako harrapatze parteak zuzen betetzen direla ere ikuskatu beharko dute, baita modu ulergarrian sinatu ere, Foru Agindu honen 8.2 artikuluan xedatutakoarekin bat etorriz.

1.10 Uxaldia hastea: Txakurrak askatzen diren unean hasiko da uxaldia.

1.11 Uxaldiak bertan behera uztea: Eguraldia dela eta uxaldia bertan behera uzten bada, uxal-  
diaren koordinatzaileek berehala eman beharko diote horren berri beren esparruko basozaintza partikularrari. Gainera, bertan behera utzi den egunaren osteko hurrengo egun baliodunean, esparruko ehiza aprobetxamenduaren esleipendun den pertsonak edo erakundeak Arabako Foru Aldundiaren Mendi Zerbitzuari jakinarazi beharko dio, eta uxaldia egiteko beste egun bat proposatuko du, egoki bada.

1.12 Tiro egiteko arauak: Ezin izango zaio tiro egin taldeko lehenengo animalari edo gidariari, zeina eme heldua izan ohi baita, ez eta basurdekumeak dituzten emeei ere.

1.13 Debekuak: Uxaldietan ezingo da petardo, klaxon edo pareko zarata elementurik erabili ehizatu beharrekoak usatzeko.

1.14 Harrapatutakoa zigilatzea: Uxaldi, gaez itxaroten, saltoan edo zelatan arku erabiltzeko modalitateetan harrapatutako basurde guztiak zigilatu egin beharko dira.

1.14.1 Zigilua atzeko hanketako batean jarriko zaio, tinko egokituz plastikozko tira horzdunarekin; hala, ezingo zaio kendu apurtu edo hondatu gabe. Zigilu hori gida gisa erabili ahalko da jatorria egiaztatu eta garraioa baimentzeko.

1.14.2 Uxaldietan, zigilua biltze puntuan jarriko da, beti esparrua utzi baino lehen; gaez itxaroten, saltoan eta zelatan arku erabiltzeko kasuetan, pieza jasotzeko unean. Ez bazaio zigilurik jartzen harrapatutako animalari, zehapena ezarriko da apirilaren 13ko 2/2011 Legeak, ehizarenak, xedatutakoarekin bat etorritz.

1.14.3 Zigilu bakoitzak ehiza esparru jakin bat izango du esleiturik, eta ezin izango da beste esparru batean erabili. Harrapatutako basurdeen zigilu kopurua harrapatze parteetan adierazi beharko da, eta arrazoi justifikaturik gabe galtzeak ez du beste berri baterako eskubiderik emango.

1.14.4 Basurdeak ehizatze denboraldia hasterakoan, Mendi Zerbitzuak ehiza esparruei zigiluak emango dizkie, dela zuzenean, dela kasuan kasuko esparru elkartearen bitartez; denboraldia bukatutakoan erabili gabeko zigiluak itzuli beharko dituzte.

2. Oreina (*Cervus elaphus*) eta orkatza (*Capreolus capreolus*): kasuan kasuko foru aginduen bidez ezarriko da haien aprobetxamendurako berariazko araudia.

### 3. artikulua. Ehiza faunaren babes orokorra

3.1. Oro har, ehiza esparru batean aldi berean saltoan harrapatzen jardun dezake, gehienez ere, pertsona batek 100 hektareako.

3.2. Arabako Foru Aldundiko Nekazaritza Sailak onartutako ehizako jarraipen planetan zehaztutakoak izango dira ehizagai kupoak, eta foru agindu honetan adierazitakoen berdinak edo gutxiago izan beharko dira.

3.3. Ehiza modalitateak Araban.

3.3.1 Ehiza larriaren modalitateak. Definizioak:

1. Uxaldia: taldeko ehiza, gutxienez hamar txakur eta sei uxatzailerekin egiten dena, lurzati jakin batean dauden ehiza larriko animaliak uxatu eta aurrez postu finko jakinetan jarri diren ehiztarienganantz joatera behartzen dituena. Gutxienez hamabi ehiztari eta gehienez berrogeita bost izaten dira, eta baimendutako baliabideak eramaten dituzte.

2. Zelatan: pertsona bakarrak egiten duen ehiza —ez taldekoa—, zeinetan ehiztariak, modu aktiboan, oinez eta baimendutako ehiza baliabideak erabiliz, ehiza larriko animaliak bilatu, jarraitu eta haiengana hurbiltzen den, harrapatzeko helburuarekin.

3. Zain egonda edo itxaronda: pertsona bakarrak egiten duen ehiza —ez taldekoa—, zeinetan ehiztariak, baimendutako ehiza baliabideak erabiliz, postu finko batean itxaroten duen ehiza larriko animaliak eskura izan arte, harrapatzeko helburuarekin.

4. Saltoan: gehienez hiru ehiztarik eta lau txakurrek egiten duten ehiza, zeinetan lurzati jakin batean ehiza larriko animaliak modu aktiboan bilatu eta jarraitzen dituzten, harrapatzeko helburuarekin.

3.3.2 Ehiza xehearen modalitateak: Definizioak:

1. Saltoan: pertsona bakarrak egiten duen ehiza —ez taldekoa—, zeinetan ehiztariak, modu aktiboan, oinez eta baimendutako ehiza baliabideak erabiliz, txakurren laguntzarekin edo gabe, ehiza xeheko animaliak bilatu, jarraitu eta haiengana hurbiltzen den, harrapatzeko helburuarekin.

2. Eskuan: gehienez ere hiru pertsonak egiten duten ehiza, zeinetan baimendutako ehiza baliabideak erabiliz, txakurren laguntzarekin edo gabe eta oinez, ehiza xeheko animaliak era koordinatuan bilatu eta jarraitzen dituzten, harrapatzeko helburuarekin.

3. Zain egonda edo itxaronda: pertsona batek edo gehiagok egiten duten ehiza, zeinetan ehiztariak, baimendutako ehiza baliabideez hornituta, postu finkoetan zain egoten diren ehiza xeheko animaliak eskura izan arte, harrapatzeko helburuarekin. Modalitate horren barruan daude usoak eta birigarroak ehizatzea neguko migrazioan eta uretako hegaztiak harrapatzea postu finkoetatik.

4. Untxiak hudoz: pertsona batek edo gehiagok egiten duten ehiza, zeinetan ehiztariak, hudoen bidez, untxiak gordelekuetatik irtenarazten dituzten, harrapatzeko helburuarekin. Modalitate horretan, aldi berean erabil daitezke baimendutako beste ehiza baliabide batzuk ere.

5. Azeriak zulo txakurrekin: pertsona batek edo gehiagok egiten duten ehiza, zeinetan ehiztariak, zulo txakurren bidez, azeriak gordelekuetatik irtenarazten dituzten, harrapatzeko helburuarekin. Modalitate horretan, aldi berean erabil daitezke baimendutako beste ehiza baliabide batzuk ere.

### 3.3.3. Baimen bereziak behar dituzten ehiza modalitateak:

1. Arkuzko ehiza urriaren 27ko 155/1999 Foru Arauaren bidez arautzen da. Arkuzko ehizan aritu nahi duten pertsonak Nekazaritza Sailaren baimen berezi bat lortu beharko dute aurretik; horretarako, ehiza federazioek aldian-aldian antolatzen dituzten gaitasun probak gainditu beharko dituzte.

2. Baimen berezia behar da untxia hudoz ehizatzeke, eta hura Nekazaritza Sailak eman behar du.

3. Ehiza hegaztien bidezko ehiza otsailaren 4ko 55/2013 Foru Aginduaren bidez arautzen da (otsailaren 15eko ALHAO, 20. zk.).

### 3.4. Baimendutako baliabideak:

3.4.1 Ehiza espezieak soilik erriflez, eskopetaz, arkuz eta ehiza hegaztien bidez harrapatu ahalko dira.

3.5 Debekuak. martxoaren 17ko 2/2011 Legeak, ehizarenak, ezarritako debekuez gain, hauexek ere debekatzen dira:

3.5.1 Errifleak erabilia ehizatzea oro har ehiza xehea eta debekualdi erdian.

3.5.2 Eratzun perkusiozko errifleak erabilia ehizatzea.

3.5.3 Airez edo beste gas konprimitu batzuek eragindako armak erabilia ehizatzea.

3.5.4 Arraza hauetako txakurrak erabilia ehizatzea: Airedale Akita Inu-a, Terrierra, American Staffordshire Terrierra, Bull Terrierra, Bullmastiffa, Cane korsiarra, dobermana, Dogo alemaniarra, Dogo argentinarra, Bordeleko Dogoa, Dogo tibetarra, Fila brasildarra, Pirinioetako artzakurra, artzakur espainiarra, artzakur napolitarra, Pit Bull Terrierra, artzain txakur alemaniarra, Beauceko artzain txakurra, Kaukasoko artzain txakurra eta beren arteko gurutzatzeak, Harrapari kanariarra, Mallorcako harraparia, Rottweilerra, Staffordshire Bull Terrierra eta Tosa Inu-a.

3.5.5 Hiru txakurrekin baino gehiagorekin ehizatzea saltoan ehiza xehean eskopetako, eta hiru ehiztarekin baino gehiagorekin eskuan.

3.5.6 Gauzez tiro egitea ahalbidetzen duten bisoreekin ehizatzea.

3.5.7 Debekualdian edo baimendutako aldiko egun eta ordu baimendu gabeetan, edozein ehiza lurzorutatik su-armak edo aire konprimituz eragindakoak eramanez igarotzea, baita zorroan badaude ere, horretarako baimen berezirik izan ezean.

3.5.8 Ehiza larriko espezie zinegetikoak ehiza garaian gizontzea, arku ehizaren kasuan izan ezik.

3.5.9 Basa espezieak ikustatzeko fokua erabiltzea, horretarako baimen berezirik izan ezean.

3.6 Txapelketak: Arabako Ehiza Federazioaren bitartez egin behar dira txapelketak antolatzeko baimen eskaerak.

#### **4. artikulua. Nekazaritzan, abeltzaintzan, mendietan eta basa faunan kalteak eragiten dituzten espezieak kontrolatzeko neurriak eta prebentzio neurriak**

Martxoaren 17ko 2/2011 Legeak, ehizarenak, 34.4 b eta 34.5 artikuluetan eta martxoaren 4ko 82/2016 Foru Aginduak, Arabako Lurralde Historikoan ehiza espezieak kontrolatzeko aparatuko neurriak arautzen dituenak, xedatutakoa aplikatuz, lurzoruren batean ehiza espezieek eragindako noiz nolako kalteak agertzen badira, haiek kontrolatzeko prozedurarik egokiena baimendu ahal izango da, eta ohiko ehiza metodoen ordean neurri alternatiboak eta prebentziozkoak bultzatuko dira bereziki.

#### **5. artikulua. Neurri osagarriak**

Animalien bizitzarako eta nekazaritza lanetarako dakarren arriskuagatik, debekatuta dago erabilitako kartutxo zorroak ehiza esparruan botata uztea. Artikulu honek jasotakoa betetzen ez bada, ehiza esparruaren elkarte, klub edo pertsona esleipenduna izango da erantzule subsidiarioa.

#### **6. artikulua. Unean uneko neurriak**

Espezieen iraupenerako batere onuragarriak ez diren gertaera klimatikoak, biologikoak edo bestelakoak direla-eta Arabako edo eskualde bateko ehiza aberastasunak kalterik izan badezake, haiei aurre hartzearen, urgentzia horretarako oztopo ez bada, eta Ehiza Lurralde Kontseiluari entzun ondoren, Nekazaritza Sailak ehiza espezie horietako batzuk edo horiek guztiak harrapatzeko aldi baimenduak aldatzeko ahalmena hartu ahal izango du beretzat. Erabaki hori komunikabide nagusietan argitaratuko da eta, ondoren, ALHAOn foru arau bidez eta ahal bezain azkar.

#### **7. artikulua. Osasun neurriak**

Zernahi ehizagai sartu edo ingururen bat birpopulatu aurretik Nekazaritza Sailaren baimena behar da, ekainaren 28ko 48/2011 Foru Dekretuak xedatutakoaren arabera. Foru dekretu horrek Arabako Lurralde Historikoan ehiza espezieak ekoiztea, birpopulatzeta eta askatzea, espezie horiek ehizarako edo erakusteko erabiltzea, eta ehiza eremu industrialen eta animaliak hezteko guneen funtzionamendua arautzen ditu.

Ehiza esparruetan harrapatutako ehiza animalien bitartez parasito gaixotasunak eta gaixotasun infekziosoak transmititzea saihesteko, esparruen adjudikaziodunei eskatzen zaie tripak atera ondoren sortutako hondakinak Arabako Foru Aldundiko Abeltzaintza Zerbitzuak lurraldean zehar horretarako baliatutako edukiontzietan uzteko.

#### **8. artikulua. Antolaketaarako neurriak**

8.1 Harrapatutakoen parte orokorrak: Ehiza esparru baten erakunde edo pertsona esleipendunak 2017-2018 ehiza denboraldian esparruan harrapaturikoaren laburpena aurkeztu beharko du 2018ko martxoaren 1a baino lehen Mendi Zerbitzuko Ehiza eta Arrantza Atalean, horretarako emango zaion inprimakian.

8.2 Orein, orkatz eta basurde uxaldietan harrapatutakoen parteak: Orein, orkatz eta basurdearen uxaldi harrapaketen berri ematen duten agiriak Mendi Zerbitzuko Ehiza eta Arrantza Atalean aurkeztu beharko dira uxaldia egin eta gehienez ere ondorengo hamar egunetan, dela elkarteen bitartez, haiekin elkartutako ehiza esparruetan, dela zuzenean, elkartu gabeetan. Agiri horietan uxaldiaren koordinatzailearen irakurtzeko moduko izenpea eta NANA agertu behar dira; koordinatzailea uxaldian bertan egondakoa izan beharko da.

8.3 Ehiza jarraipena egiteko urteko planak: Ehiza esparruen ehiza jarraipena egiteko urteko planak Ehiza eta Arrantza Atalean aurkeztu behar dira urte bakoitzeko urriaren 12a baino lehen.

8.4 Esparruko matrikula ordaintzea: Ehiza esparru bakoitzeko matrikularen tasa Arabako Foru Aldundian ordaindu beharko da urte bakoitzeko ekainaren 30a baino lehen.

#### **9. artikulua. Ehiza txartelak**

Esparru bateko kide diren pertsonen ehiza txarteletan kontzeptu hauek argi eta garbi zehaztu beharko dira: ehiztariaren izena, bi abizen eta NANA, ehiza esparruaren izena, baimendutako ehiza modalitateak, txartelak zein ehiza denboraldirako balio duen, sinadura ulergarria eta, hala badagokio, esparruaren entitate esleipendunaren zigilua.

#### **10. artikulua. Babesneurriak**

Pertsonen segurtasuna oro har bermatu ahal izateko, gomendatzen da kolore deigarriko txalekoak erabiltzea ehiza xehean aritzean.

#### **11. artikulua. Merkaturatzea**

Irailaren 15eko 1118/1989 Errege Dekretuak xedatzen duenez, basahatea, oreina, galeper arrunta, untxia, orkatza, fisaia, basurdea, erbia, pagausoa, txoloma, eper gorria eta azeria dira Araban merkaturatu daitezkeen ehiza espezie bakarrak.

#### **12. artikulua. Kuartangoko ehiza esparru soziala**

Ehiza esparru sozialean oilagorrek harrapatzeko eskaerak 2017ko irailaren 1etik 15era aurkeztuko dira, eta horren funtzionamendurako arauak kasuan kasuko foru aginduz argitaratuko dira.

#### **13. artikulua. Arau hausteak**

Foru agindu honetako arauak hausten badira, martxoaren 17ko 2/2011 Legeak, ehizarenak, eta ekainaren 14ko 8/2004 Foru Arauak, Arabako Lurralde Historikoko ehizarenak, ezarritakoaren arabera ezarriko dira zehapenak.

Xedapen indargabetzailea

Indargabetuta gelditzen dira foru agindu honetan xedatutakoaren aurka doazen maila bereko edo apalagoko xedapenak.

Azken xedapena

Foru agindu hau ALHAOn argitaratu eta hurrengo egunean sartuko da indarrean.

Vitoria-Gasteiz, 2017ko uztailaren 18a

*Nekazaritza Saileko foru diputatua*  
EDUARDO AGUINACO LÓPEZ DE SUSO

*Nekazaritza zuzendaria*  
M<sup>a</sup> ASUNCIÓN QUINTANA URIARTE

## I. ERANSKINA

Honako hauek dira ehiza xeheko espezieak:

Istingor txikia (*Lymnocyptes minimus*), istingor arrunta (*Gallinago gallinago*), basahatea (*Anas platyrhynchos*), ipar ahatea (*Anas strepera*), ahate buztanluzea (*Anas acuta*), antzara hankagorritza (*Anser anser*), hegabera (*Vanellus vanellus*), oilagorra (*Scolopax rusticola*), uda zertzeta (*Anas querquedula*), zertzeta arrunta (*Anas crecca*), galeper arrunta (*Coturnix coturnix*), untzia (*Oryctolagus cuniculus*), belabelta (*Corvus corone*), ahate mokoabala (*Anas clypeata*), arabazozo pikarta (*Sturnus vulgaris*), faisai (*Phasianus colchicus*), kopetazuri arrunta (*Fulica atra*), haitz usoa (*Columba livia*), pagausoa (*Columba palumbus*), txoloma (*Columba oenas*), eper gorria (*Alectoris rufa*), murgilari europarra (*Aythya ferina*), murgilari mottoduna (*Aythya fuligula*), ahate txistularia (*Anas penelope*), usapala (*Streptopelia turtur*), mika (*Pica pica*), birigarro txikia (*Turdus iliacus*), garraztarroa (*Turdus visvivorus*), birigarro arrunta (*Turdus philomelos*), durdula (*Turdus pilaris*) eta azeria (*Vulpes vulpes*).



**II. ERANSKINA**

Ehiza larriaren uxaldietan nahitaez jarri behar den seinalearen ezaugarriak

Neurriak:	50 cm. x 35 cm
Materiala:	Aluminioa, altzairu herdoilgaitza, PVC edo antzekoren bat
Kolorea:	Atzealde zuria, ertz gorriko triangelu bat (3,5 cm-ko lodiera), barruan basurde beltz bat duela
Testua:	KONTUZ (goiko aldean) UXALDIA (beheko aldean)
Testuaren kolorea:	Beltza
Testuaren lodiera:	5 cm altueraz 2 cm zabalera

**II. ERANSKINA****KONTUZ / ATENCIÓN****UXALDIA / BATIDA**